

文

選

旁

證

文選旁證卷第六

長樂梁章鉅撰

卷四下 三都賦序

注 徵爲秘書 書下當有郎字

注 三都者 六臣本以此下四十六字爲向注

注 三都賦成張載爲注魏都劉逵爲注吳蜀 六臣本以此注

爲臧榮緒晉書文楊氏慎曰凡諸注解按晉陽秋皆思自注
欲重其名故假借名姓耳

然相如賦上林而引盧橘夏熟揚雄賦甘棠而陳玉樹青蔥

徐氏文靖曰李尤七款梁土青麗盧橘是生白花綠葉扶疏
冬榮當相如時武帝新開上林苑羣臣八方競獻名果珍樹
種之上林安必所獻者無盧橘也又曰西京雜記初修上林

苑羣臣遠方各獻名果異樹亦有製爲美名以標奇異白銀樹十株黃銀樹十株琉璃樹七株則槐樹之名玉樹從可知矣丹鉛總錄云玉樹非謂自然生之猶下句馬犀金人也張衡賦西京而述以遊海若張氏雲璈曰西京賦海若乃極言清淵之大將使海若亦來遊也上文神山瀛洲方丈蓬萊皆屬形容之辭太沖譏之似過

注面相序罪也序當作斥各本皆誤

讚事者宜本其實匪本匪實六臣本本作准兩匪皆作非注虞書曰書下當有序字按禹貢釋文作夏書此或據古本孔疏謂初在虞書而夏史抽入或仲尼退第是也

蜀都賦

峭函有帝皇之宅六臣本皇作王

請爲左右揚摧而陳之

注

許慎淮南子注曰揚摧粗畧也

莊

子徐無鬼篇則可不謂有大揚摧乎釋文引許慎注揚摧粗畧法度也淮南子似真訓物豈可謂無大揚摧乎高誘注揚摧猶無慮大數名也漢書敘傳揚摧古今監世盈虛述食貨志第四揚摧古今猶言約畧古今上文云畧存大綱以統舊文述禮樂志第二下文云畧表山川彰其剖判述地理志第八皆是此意續漢書律志云其可以相傳者惟大摧常數而已廣雅釋訓揚摧都凡也義並同然則郭象莊子注謂摧而揚之王叔之義疏謂摧畧而揚顯之顏師古漢書注謂揚摧者舉而引之陳其趣也皆失之矣

帶二江之雙流

水經江水注云江水又東逕成都縣縣有二

江雙流郡下故揚子雲蜀都賦曰兩江珥其前也雙流二字

本此漢地理志云郫禹貢江沱在西東入大江錢氏站斟注
地理志云今日郫江也蜀中水自李冰鑿離碓穿二江以後
已變禹舊迹其原無可復攷今自灌縣分江至瀘州復合者
此也又曰大江自灌縣西分爲二一流東循灌城曰北江一
流東南逕崇慶州至新津縣曰南江也又隋地理志仁壽元
年郡置雙流縣以此

注積三萬四千歲 何曰李白蜀道難作三萬六千歲

注靈關山名在成都西南漢壽界 胡公攷異曰壽當作嘉謂
漢嘉郡也各本皆誤下所言在成都西北岷山界謂岷山郡
晉書地理志之汶山郡也岷汶二字古每通用所言在成都
南犍爲界謂犍爲郡句例正同

水陸所湊 五臣湊作臻良注可證

枕騎交趾 五臣騎作倚向注可證

^注牂牁郡也 案牁當作柯見漢書地理志注船枝也葉氏夢

得玉澗雜書曰牂牁本繫船杙名今人但云是郡名耳

^注翠微山氣之輕縹也 爾雅釋山未及上翠微郭注近上旁

陂而初學記引舊注一說山氣青縹色曰翠微與此注合

^注墩夫子哀時命曰 漢書藝文志莊夫子賦二十四篇名忌

吳人顧氏千里曰王逸楚辭注十四哀時命者嚴夫子之所
作也夫子名忌洪興祖補注忌會稽吳人本姓莊當時尊尙
號曰夫子避漢明帝諱曰嚴一云名忌字夫子

漏江伏流潰其阿 六臣本伏作汰案水經葉榆水注云葉榆

水又東逕漏江縣伏流山下復出巉口謂之漏江左思蜀都

賦曰漏江汎流云云亦作汰也

注龍池在朱堤南十里 陳校堤改堤下注生朱堤南廣縣句

同各本皆誤

旁挺龍目 涪翁雜說云龍眼惟閩中及南越有之太沖自言

作三都賦所有皆責土物之貢至言龍目亦不自知其失按
宋張世南游宦紀聞亦云愿徧蜀道風俗方物靡不質究所
謂龍目未嘗見之然蜀志有建寧太守遙領交州之文御覽
果部載交趾七郡獻龍眼則賦蜀都而及之亦未爲失矣

注邛竹出興古盤江以南 水經葉榆水注云盤水又東逕漢

興縣山溪之中多生邛竹桃柳樹出麪而夷人資以自給故
蜀都賦曰邛竹緣嶺又曰麪有桃柳按晉書地理志興古郡
蜀置統縣十一漢興卽其屬縣洪氏亮吉日興古蜀漢建興
三年分建寧牂柯郡置故此賦注中屢見興古也

注蒙霜雪而不變 變當作變

金馬騁光而絕景碧鷄儵忽而曜儀火井沈熒於幽泉高燭飛
燭於天垂 梁氏玉繩曰火井二句是一事案世說五注載太
沖初作賦云金馬電發於高岡碧鷄振翼而雲披鬼彈飛丸
以礪礪火井騰光以赫曦似鬼彈火井偶對爲勝

注羣翔與古十餘 又可以醺祭而置也 陳校餘下疑脫日字
置改致是也各本皆有脫誤

注欲出其火先以家火投之須臾許隆隆如雷聲燭出通天光
輝十里以簫盛之接其光而無炭也 續漢書郡國志蜀都注
引此賦注燭出作燭然輝作耀簫上有竹字

注說文曰燭火焰也 今說文燭火門也席氏世昌曰火門不
可解當從李引惟焰字當作燄段曰焰俗字當作燭門爲燭

之壞字若燄字在炎部云火行微燄燄也與爛異解

其間則有虎珀丹青

注

虎珀一名江珠

孫氏志祖曰此賦下

句又云江珠瑕英則非一物而二名也

江珠瑕英

洪氏亮吉曰珠字从玉古人之珠皆以玉爲之續

漢書輿服志冕系白玉珠爲十二旒三公諸侯七旒青玉爲

珠卿大夫五旒黑玉爲珠所謂白玉珠青玉珠黑玉珠皆琢

小玉之白青黑者爲之此歐陽大小夏侯皆承周秦以來先

儒舊說明三代之制冕旒垂珠皆琢玉爲之非蚌珠也珠亦

有天然不須琢者蜀都賦所云江珠瑕英青珠黃環及子虛

賦之玫瑰注引倉頡篇玫瑰火齊珠又山海經之懸山楚水

多白珠皆玉珠之天然不須琢者亦皆非蚌珠也蚌珠亦各

珠者以其形之似名之古人不單呼爲珠必加字於上以區

別之則禹貢之蠙珠是矣按周書王會解伊尹爲四方令曰
正西語令以丹青白旄紕屬江厯龍角神龜爲獻孔晁注江
厯珠名江珠殆卽江厯蜀係西方之國故得有是歟

阻以石門 水經沔水注云褒水又東南厯小石門門穿山通
道六丈有餘刻石言漢明帝永平中司隸校尉犍爲楊厥之
所開逮桓帝建和二年漢中太守同郡王升嘉厥開鑿之功
琢石頌德以爲石牛道蜀都賦阻以石門其斯之謂也門在
漢中之西褒中之北

注劍閣谷名 按水經漾水注云白水又東南逕小劍戍北西
去大劍三十里連山絕劍飛閣通衢故謂之劍閣也似不當
作谷名大劍小劍皆山名漢劍門縣唐劍門關置於此也

嘉魚出於丙穴 水經江水注云江水東右合陽元水水出陽

江縣西南高陽山東丙水注之水發縣東南柏枝山山下有丙穴穴方數丈中有嘉魚常以春末游渚冬初入穴抑亦襄漢丙穴之類也

注有鱗曰蛟螭蛟螭水神也一曰雌龍也一曰龍子也 段曰劉說似以蛟螭爲一物然上林賦蛟龍赤螭文穎曰龍子爲螭張揖曰赤螭雌龍也皆劉所本此賦與南都賦之怖蛟螭張左皆不謂一物案螭爲龍屬或稱螭龍後漢書張衡傳注無角曰螭龍是也蛟亦龍屬或稱蛟龍楚辭天問注有鱗曰蛟龍淮南墜形訓注蛟龍有鱗甲之龍是也又或稱蛟螭此處劉注及吳都賦蛟螭與對注螭龍子也是也析言之則蛟與螭固別矣說文虫部分列是也

注枚乘七發曰波湧而濤起橫奔似雷行 本書七發此二語

上下相隔四十餘句

櫻枒楔欂 六臣本枒作柳孫氏義鈞曰楔疑櫻之誤本書南都賦檉松楔櫻注引爾雅楔曰荆桃郭璞曰櫻桃也郭璞山海經注櫻似松柏有刺此注云似松有刺當是釋櫻之語賦注俱譌爲楔耳說文櫻細理木也

羲和假道於峻岐陽烏迴翼乎高標 何曰高標疑卽高望山古名高標在嘉州郡峻岐未詳疑亦地名按此說似鑿濟注岐樹奇枝也高標高枝也承上修幹長條言之似尙近理然以岐樹爲奇枝則不知所出矣

左繇巴中 向注繇厯也余曰繇州涪水所出涪居其右綿居其左故曰左繇

注宕縣在巴西 縣當作渠各本皆誤

巴菽巴戟靈壽桃枝 華陽國志其藥物之異者有巴戟天椒

又云竹木之瑣者有桃枝靈壽

注出巴東北新井縣水出地 胡公攷異曰新字當在縣字下

北井當連文縣名也晉太康以前屬巴東郡見華陽國志

蚰蜥山棲 六臣本蚰蜥作驚鵲玉篇作蠹蜥山鷄也

鼃龜水處 注鼃大龜也 六臣本鼃作元 注中鼃作元龜是也

胡公攷異曰各本作鼃者皆因劉注元龜二字誤爲鼃字因

改正文又正文下有元字乃割裂所見之校語以爲音耳

注其緣中又似璚瑁俗名曰靈又 兩又字皆當作义見華陽

國志涪陵郡下

注李尤七款 胡公攷異曰款當作款或作難作疑皆非

丹沙赧熾出其坂 注尙書禹貢曰厥土赤埴 按禹貢釋文徐

鄭王皆讀埴曰熾故劉注引書以赤解埴以埴解熾耳下李
注引尙書注熾赤也亦當是禹貢注

^注廣雅曰悍勇也 本書江賦注引同而今廣雅釋詁勇也節

無悍字朱氏珔曰一切經音義引廣雅亦有悍字蓋今本因
悍悍二字相連傳寫佚脫故王氏疏證卽據此以補

^注武帝樂府 何校帝下添立字陳同各本皆脫

^注在漢壽西界 壽當作嘉各本皆誤說見前下注九折坂在
漢壽嚴道縣云云壽亦當作嘉

^注驛傳其詩奏之 胡公攷異曰驛當作譯各本皆誤事在范
書西南夷傳也

蹲鴟所伏 漢書貨殖傳蹲鴟作駿鴟華陽國志汶山郡都安
縣有大芋如蹲鴟水經江水注云江原縣有青城山山上有

嘉穀山下有蹲鴟卽芋也所謂下有蹲鴟至老不饑

注出岷山在安都縣 胡公攷異曰在字衍安都當作都安下

注金堤在岐山都安縣西又岷山都安縣有兩山相對立如

闕皆可證晉書地理志汶山郡有都安縣

青珠黃環 本草綱目青琅玕一名石闌干又名青珠李時珍

引別錄曰石闌干生蜀都平澤陶宏景云此蜀都賦之青珠

黃環也按太平御覽九百九十三藥部有黃環引本草經云

一名陵泉一名大就生蜀郡又引吳普本草云黃環一名生

葛亦可訂今本草綱目一名生葛之誤

風連莛蔓於蘭皋 段曰陳藏器本草拾遺引南都賦風衍蔓

延於蘅皋蓋卽引此賦而誤也

注生越雋郡無會縣 又出岷山替陵山 又 一曰出廣都山 胡

公攷異曰無會當作會無替當作蠶陵下都下並不當有山
字晉書地理志汶山郡有蠶陵縣又廣都屬蜀郡也

注岷山特多藥草其椒尤好異於天下 續漢書郡國志蜀郡

注引蜀都賦注岷山特多藥其椒特多好者絕異於天下之
好者與此少異

注池潛既道有水從漢中沔陽縣南流至梓潼漢壽縣入穴中

通岡山下西南潛出今名複水 六臣本潼作潼是也胡公攷

異曰漢中二字不當有沔當作江漢當作晉續漢書郡國志
犍爲郡江陽劉昭注引賦此注從縣南流至漢嘉縣云云當
據之訂正江陽晉書地理志屬江陽郡或漢中亦江陽之誤
段曰江陽者今之瀘州雒水入江之處潛水在今重慶府入
大江重慶者古之巴郡江州縣上距瀘州約四百里水經所

謂江至巴郡江州縣東強水涪水漢水白水宕渠水五水合
南流注之者也酈注云宕渠水卽潛水渝水矣倘云江陽至
漢壽則須由今瀘州逆流至今廣元縣自南而北水將何入
乎水經潛水出巴郡宕渠縣酈云潛水蓋漢水支分潛出故
受其稱此注漢中沔陽云云卽酈說所本漢中沔陽字本不
誤不可刪改作江陽也今續漢書郡國志犍爲郡江陽縣下
引此注刪去漢中沔陽四字漢壽作漢嘉西南作因南旣誤
引又誤改而不知其於地理斷不可通矣又案水經漾水注
云劉澄之云有水自沔陽縣南至梓潼漢壽入大穴暗通岡
山又邢昺爾雅疏引郭璞爾雅音義云有水從漢中沔陽南
流至梓潼漢壽入大穴中通峒山下西南潛出一名沔水云
云此皆足爲漢中沔陽四字不誤之證

注 過漢壽南流 壽當作嘉各本皆誤水經涑水注云涑水出

岷山西東流過漢嘉郡

注 雒水在上雒縣出桐柏山 水經江水注云雒水出雒縣漳

山亦言出梓潼縣柏山劉注當卽引此而誤衍上字出下脫
漳山一曰在梓潼縣出九字又衍桐字耳

梗稻莫莫 五臣莫莫作漠漠銑注可證

灑淝池而爲陸澤 注 蔡邕曰凝雨曰陸 陸當作瀆見南都賦

爲溉爲陸下廣韻一屋瀆凝雨澤也可爲證

注 李冰於湔山下造大壩以壅江水分散其流溉灌平地 水

經江水注云江水又厯都安縣縣有桃關漢武帝祠李冰作
大堰於此壅江作壩壩有左右口謂之湔壩益州記曰江至
都安堰其右檢其左其正流遂東邛江之右也因山頽水坐

致竹木以溉諸郡又穿羊摩江灌江西於玉女房下白沙郵作三石人立水中刻要江神水竭不至足盛不沒肩是以蜀人旱則藉以爲溉雨則不過其流故記曰水旱從人不知饑饉沃野十里世號陸海謂之天府也郵在堰上俗謂都安大堰亦曰滿堰又謂之金隄左思賦云西踰金隄者也乃宋史志言李冰於離堆都江口置大堰疏北流爲三元史志言李冰鑿離堆分江以灌川蜀民用富饒是混水之鑿堆壩江爲一事矣

注蜀都臨邛縣又蜀都嚴道都並作郡各本皆誤

百果甲宅又朱櫻春熟五臣宅作坼熟作就良注可證

注周易曰百果草木皆甲坼六臣本坼作宅是也易甲坼馬融陸績本皆作甲宅此注下文引根曰宅宅居也云云可知

上引易正文亦當作宅與此賦正文正合

注皆讀如人倦之解解 胡公攷異曰之解當作解之

注令櫻桃熟可嘗也 陳曰令當作今是也按叔孫通傳云方今櫻桃熟可獻非嘗字各本皆誤

蒲陶亂潰若榴競裂 五臣陶作桃若作石良注可證朱氏珣曰蒲萄之苟或作陶或作桃並同聲通用說文苟本訓草也而今以爲蒲萄字一切經音義引通俗文西域出蒲萄餘多作陶者如史記大宛傳漢書西域傳本書則此處及魏都上林等賦皆然不必從五臣本也

芬芬酷烈 六臣本下芬字作芳是也

其園則有蒟蒻茱萸 六臣本園作圃按上已有其園此園當是傳寫之誤孫氏志祖曰園則賦果圃則賦疏

蒟蒻醬也又蒟草也其根名蒟頭華陽國志其果實之珍

者蔓有辛蒟園有芳蒟是蒟蒻二物也而酉陽雜俎云蒟蒻

根大如椀爾雅翼及本草並謂蒟頭生吳蜀一名蒟蒻是又

以蒟蒻為一物矣蒟蒻漢書西南夷傳作枸醬劉德注不及

此注之核惟謂子長二三寸則兩注均誤顏師古曾辨之

曰往菲微六臣本微誤作薇

其沃瀛段曰山海經是惟瀛土之國郭注瀛沃衍也是瀛當

作瀛矣

雜以蘊藻注傳曰蘋蘩蘊藻之菜今左傳蘊作蘊注蘊藻聚

藻也此正文及注亦當為蘊字

注爾雅既將又維葉杞杞六臣本將作時是也此解時味二

字今詩杞杞作泥泥釋文云張揖作茈茈

鷺鷥

注

毛詩曰振鷺于飛

詩毛傳振羣飛貌正義云此鳥名

鷺而已則是非振鷺連文也後人因振加鳥玉篇乃有鷺字以爲鷺鳥別名而此處劉注亦謂鷺鷥爲鳥名矣然李注引詩不言鷺與振通或李本不作鷺歟

其深則有白鼃命鼃 林先生曰焦贛易林鼃鳴岐野鼃應於泉張氏雲璈曰埤雅鼃以鼃爲雄鼃以鼃爲雌鼃鳴而鼃應故注云命呼也

注

鱣鮪也

胡公攷異曰鱣當作鮪各本皆誤吳都賦筌鮪

鱣善注鮪鮪鮪也可借證

注

張衡應問曰

問當作問各本皆誤

關二九之通門

揚雄蜀都賦其都門二九四百餘閭

注

漢武帝元鼎二年立成都十八門

續漢書郡國志蜀郡注

引此注都下有郭字段曰臧官傳注引張注十八門下有小
維郭門蓋其數焉八字姜氏舉曰元鼎二年臧傳作三年按
玉海百六十九引公孫述傳臧官軍至咸門注成都北面有
二門其西者名咸門成都志曰大城九門少城九門唯咸門
朔門秦漢舊名也是在當時十八門已不可攷

注

陽城蜀門名也 六臣本城作成胡公攷異曰門名不俟更
言城必成字也以此訂之正文亦當作成

武義虎威 六臣本武作虎

當衢向術 術當讀作遂與下駟韻

匪葛匪姜疇能是恤 何曰此語強湊當是此二人亦必治第
張氏雲璈曰賦正言孔明伯約乃心王室不暇以居處爲懷
諸高門結駟者安能如葛姜之是念非謂二公有治第事也

濟注恤居也按漢書韋元成傳恤我九列顏注恤安也

袞服靚粧又異物嘔詭六臣本粧作莊嘔詭作詭譎

邛杖傳節於大夏之邑五臣杖作竹良注可證

注張揖曰靚調粉白黛黑也段校云此句是上林賦注今史

記漢書作郭璞語非也

注出番禺城下此下應再引西南夷傳蒙歸至長安問蜀賈

人獨蜀出枸醬多持竊出市夜郎夜郎者臨牂柯江云云

注曜靈白日也白字不當有各本皆衍

注黃潤織美宜制禪六臣本禪作禪是也說文禪衣不重

倭倭隆富段曰疑卽詩之咳兮倭兮上倭當作咳

藏鏹巨萬胡公攷異曰鏹當作鏹注同漢書食貨志作鏹劉

注引之可證廣韻云鏹當作鏹太沖時未必有此俗字也匡

謬正俗五云食貨志云臧緡謂緡贗錢故總謂之緡耳而後之學者謂緡爲錢乃改爲緡字無義可據按孔子云四方之人緡負其子而至謂以緡絡而負之故謂緡褌耳豈復關貨泉耶正字通云白緡金別名漢食貨志萬室之邑藏緡千萬緡音同義別錢謂之緡以索贗錢謂之緡

注漢書貨殖傳曰蜀卓氏之臨邛公擅山川銅錢上爭王者之利下錮齊人之業富至僮八百人程鄭亦治鑄富埒卓氏

此引漢書文前後錯互今漢書貨殖傳曰蜀卓氏之臨邛卽鐵山鼓鑄運籌算買滇蜀民富至童八百人又云程鄭亦治鑄富埒卓氏又云至于蜀卓宛孔齊之刀間公擅山川銅錢魚鹽市井之人運其籌策上爭王者之利下錮齊民之業

注殖貨志曰

何校殖攷食陳同是也六臣本作貨殖並非

注藏鎡管子之文也 姜氏舉曰漢書食貨志藏鎡千萬藏鎡百萬卽蒙管子輕重等篇爲文孟康注亦曰鎡錢質也管子曰凶歲糴釜十絰

注以持祿養 胡公攷異曰養下當有交字此引臣道篇文

扼腕抵掌 胡公攷異曰抵當作抵注同廣韻四紙抵抵掌說

文云側手擊聲也與十一薺之抵迥然有別甚明西征賦爲

蕭揚州作薦士表廣絕交論用抵掌者放此今皆誤作抵

注抵戲篇 段校云今鬼谷子作抵戲

注桓譚七說曰 譚當作麟各本皆誤本書七命注祭屈原文

注並引桓麟七說後漢書桓麟傳注引摯虞文章志麟文見

在者七說一首可證也

注吉日兮良辰 陳校良辰二字乙轉是也各本皆倒

肴榻四陳 六臣本榻作核

注猶衛之雅質 雅當作稚各本皆誤

翩躚躚以裔裔 注詩曰屢舞躚躚 五臣躚躚作僊僊向注可

證今詩作屢舞僊僊云遷徙屢敗也莊子在宥篇僊僊坐起之貌是也玉篇蹠蹠猶蹠蹠也意皆相近

注楚徙宅西河長公思故處始作西音長公繼是音以處西山

秦國之風蓋取乎此見呂氏春秋 楚當作整長公二字不當

有今呂氏春秋音初篇作殷整甲徙宅西河猶思故處實始

作為西音長公繼是音以處西山秦穆公取風焉實始作為

秦音云云竹書紀年河亶甲名整自囂遷於相卽其事

注觀者萬堤 萬當作方各本皆誤

西踰金隄 水經江水注引此句已見上

朔別期晦

六臣本期晦作晦期是也注作晦期可證

涉蹠寥廓

五臣蹠作獵向注可證

蹠五岬之蹇澹

五臣澹作產良注可證

注彭門鴻岬

又在漢壽嚴道縣

岬當作峴壽當作嘉

注五岬山名也一山有五重在越嶲當犍爲南安縣之南也

續漢書郡國志犍爲郡南安注引蜀都賦注曰縣之南有五

岬山一山而五里在越嶲界與此稍異

晶軀氓於萋草

注

當爲拍

五臣晶作拍翰注可證段曰說文

晶顯也倉頡篇曰晶明也太沖用此字亦是明顯之意軀人

能化爲虎幽怪難識令不得遁其形也改爲拍非是

注魏完南中志所記也六臣本完作宏是也

彈言鳥於森木三國志王朗傳牙獸屈膝言鳥告歡

注 文立蜀都賦虎豹之人 六臣本文作又無下八字而與下

節注相連胡公攷異曰晉有文立劉並時人決非所引

注 淮南子曰飛鳥鍛羽走獸廢足許慎曰鍛殘也 今淮南子

倣真訓廢足作擠腳覽真訓作廢腳又本書五君詠謝宣遠

答靈運詩江文通雜體詩引許慎注並同惟辨命論注引作

鍛羽殘羽也一切經音義五又引作鍛羽而飛

相與第如滇池 六臣本第作弟按史記五帝紀贊顧弟勿深

考徐廣注弟但也引此賦弟如滇池則作第爲後人所改

艤輕舟 五臣艤作漾向注可證

娉江斐與神遊 注 語在列仙傳 五臣斐作妃向注可證按斐

卽妃字吳都賦江斐於是往來曹全碑長女桃斐真諸江姝
登潛而解佩又作婣皆古妃字此事北堂書鈔衣冠部藝文

類聚靈異部並引列仙傳與此注畧同惟事類賦寶貨部引
列仙傳曰鄭交甫至漢皋臺下見二女佩兩珠大如荆雞卵
二女解與之既行反顧二女不見佩珠亦失字句與此注大
異而與南都賦注所引韓詩外傳畧同今無以考之也

注俗謂正船迴濟處爲舫 胡公攷異曰迴當作向

珠貝汜浮 又酌清醑 又漫乎數百里間 六臣本汜作沈清作

醪里下有之字

注善曰旣載清醑毛萇詩曰 六臣本無詩字是也陳校善曰
下添詩曰二字各本皆脫

天帝運期而會昌 三國志秦宓傳注引帝作地

注河圖括地象曰岷山之地土爲井絡帝以會昌神以建福上
爲天井 水經江水注引下地字作精而無上爲天井句三國

志秦宓傳曰蜀有汶阜之山江出其股帝以會昌神以降福

裴注亦引河圖括地象與此同惟井絡上多東字

注上爲東井維絡 六臣本無絡字

注俗說云字化爲子規蜀人聞子規啼皆曰望帝也 按華陽

國志云蠶叢魚鳧之後有王曰杜宇稱帝號曰望帝會有水
災其相開明決玉壘山以除水害帝遂委以政事禪位於開
明帝升西山隱焉時適二月子規鳥鳴蜀人悲之故聞子規
之鳴卽曰望帝其實非變化也

羌見偉於瞻昔 六臣本羌作嗟

注善曰降邱宅土 何校善曰下添尙書曰三字陳同是也

蔚若相如 五臣蔚作鬱向注可證

是故遊談者以爲譽 六臣本譽作美

注漢靖王勝後也 陳校靖上添中山二字各本皆脫

卷五 吳都賦

注吳都者蘇州是也後漢末孫權乃都於建業亦號吳 六臣本此一節不標注家姓名疑非劉李注亦並非五臣注也案此賦注往往有六臣本所無者皆後人竄入並非劉孝之舊胡公攷異已詳列之茲採其有關考訂者餘不悉具

劉淵林注 何曰三國志注云晉衛權作吳都賦序及注序粗有文辭至於爲注了無發明直爲塵穢紙墨不合傳寫

駭然而哈 何校駭改駭陳同是也各本皆誤

玉牒石記 五臣牒作譟銑注可證姜氏舉曰今說文片部牒札也木部札牒也段曰太史公書借譟爲牒札字

注說文曰牒札也 胡公攷異曰說文曰三字不當有後劉注

呂引說文稱爲許氏記字此非劉元文明甚李注又引札作記蓋因正文記字而誤耳

瑋其區域 五臣瑋作偉翰注可證

徇蹲鴟之沃

注

吾聞岷山之野下有蹲鴟

按史記貨殖傳云

岷山之下沃野下有蹲鴟引以注此似不當刪下沃二字

齷齪而算

齷當作握六臣本校云善作握

顧亦曲氏之所歎也旁魄而論都抑非大人之壯觀也 六臣

本顧作固都下有邑字壯上有所字潘氏耒曰都字衍涉論

都而誤耳胡公攷異曰旁魄而論與上握齷而算偶句各四

字不當偏贅一字

注

靖蛉縣禺山

靖當作青禺下當有同字各本皆誤續漢書

郡國志越嶲郡及水經注淹水條可證

注易無妄曰 無當作无魏都賦注引漢書陽九厄今本漢書作易九厄而此注又作易无妄實一事也漢獻帝禪位詔曰遭无妄厄運之會值炎精幽昧之期

妄可以儼王公而著風烈也 胡公攷異曰儼當作麗著當作奢劉注麗著也引麗王公也善注奢靡引倣化奢麗皆可證銑注作儼作著遂以五臣亂善與注不相應矣朱氏珔曰儼麗亦通公羊莊廿一年傳士受儼皮釋文儼本作麗荀子正名篇名之麗也注麗與儼同

注麗王公也 今易麗作離釋文音麗鄭作麗而不覩上邦者 六臣本覩作覲

注說文曰磧水渚有石也 今說文渚作渚也作者

子獨未聞大吳之巨麗乎 六臣本校云五臣巨作壯

蓋端委之所彰高節之所興注端委至德太伯也高節克讓延

陵也按此李注最爲分晰而濟注乃云太伯延陵端其志操

委棄其位以存讓體是與高節也合兩人之事而混同注之
宜爲邱光庭之所譏矣

由克讓以立風俗又輕脫躡於千乘六臣本無俗字躡作屣

注袖長而裳齊段校袖上添又曰二字

注左傳曰吳子諸樊既除喪將立季札札曰聖達節次守節下

失節爲君非吾節也遂讓不受朱氏珣曰聖達節云云爲

成十五年傳曹子臧語札讓國在襄十四年傳但稱其述子

臧事無此數語注乃誤合爲一

故其經畧又包括千越六臣本故作固千作于注同胡公攷

異曰案正文當作千善引漢書及音義當作千引春秋杜注

當作于春秋曰上當有一曰二字今注皆有誤

注左傳曰天子經畧土地定城國制諸侯畧分界也 今左傳

惟昭七年有天子經畧一語其土地以下疑出左傳古注

注爾雅曰星紀斗牽牛也吳分野斗者日月五星之所經始故

謂之星紀 按爾雅星紀斗牽牛也春秋正義三十八引孫炎

注曰星紀日月之所終始也故謂之星紀此所引似亦是孫

注但多吳分野三字終始作經始爲異耳

注嫫女越分翼軫楚分非吳分故言寄曜寓精也 六臣本作

越楚地皆割屬吳故言嫫女翼軫寄曜寓精也似勝此注

注地理志曰餘姚縣蕭山瀟水所出 漢書地理志姚作暨瀟

作潘何陳並據之校改是也續漢書郡國志會稽郡引魏都

賦注有蕭山潛水出焉卽此文但誤吳爲魏復誤潘爲潛

注武林水所出龍川 六臣本作武林龍川出其坳案今漢書地理志錢塘武林山武林水所出注當依此改正龍川字不當有皆涉上節正文而誤耳

注說文曰泓下深大也 今說文泓下深兒

修鯢吐浪 段曰水經注溫水篇引左思吳都賦吐浪泮柯今此篇祇有修鯢吐浪句蓋三都皆屢有改本不同也

琵琶 袁氏文苑歸閒評云吳都賦蛟鰐琵琶注云琵琶魚無鱗其形似琵琶豈今所謂鰐魚乎

鰐鮓 山海經北山經敦薨之山其中多赤鯪郭注今名鰐鮓爲鯪魚鯪音圭案玉篇鮓作鰐云鰐鮓鮓也食其肝殺人廣雅鰐鮓鮓也背青腹白觸物卽怒其肝殺人則正今之河豚耳河豚俗又名鰐蓋卽鯪之或體字王氏念孫曰河豚善怒

鮭之言惠魴之言訶皆其義也

鮠鮠鰕鰕 段校鮠作印鰕作鰕注同云廣韻鰕廣刃斧也一

切經音義引薛氏異物志正作鰕

烏賊注烏賊魚腹中有藥 證類本草引蘇頌圖經云腹中有

墨可用故名烏魴然則腹中有藥疑有墨之譌

鰐鰐 六臣本鰐作勾

注雄曰鯨雌曰魴又一說曰鯨猶言鳳魴猶言皇也 案後說

同前說左傳宣十二年正義引裴淵廣州記云鯨魴長百尺

雄曰鯨雌曰魴王氏念孫曰雌鯨之爲魴猶雌虹之爲霓

注詩曰汭澗從之 今詩汭作遡字同

注淮南子曰水濁則魚噉喁 六臣本淮南子作文子是也今

淮南子主術訓有此語無喁字韓詩外傳云水濁則魚噉又

無噉字說文喁魚口上見也廣雅釋言噉喁也皆單釋之惟集韻引字林云噉喁魚口出水兒

鳥則鵠鵠鵠

注

鵠鵠水鳥也

本書上林賦駕鵠屬玉卽鵠

鵠音同而字異漢書宣帝紀注晉灼曰屬玉水鳥似鵠鵠

注

鵠如鷺

毛本鵠作鷺段曰此三字當作如鷺二字與上林

賦注合

胡可勝原

六臣本原作源

迴眺冥蒙

又

洪桃屈盤

六臣本迴作迴屈盤作盤屈

注

水經曰東海中有山焉名曰度索上有大桃屈盤三千里

姜氏舉曰桑欽水經無此文十洲記有之桃下有樹字三作

數並散見於神異經拾遺記漢武帝故事博物志諸書

注

生其華藥仙人所食

又

漢書歌曰六臣本生作食無仙人

所食四字無書字別本或無曰字毛本華作葉

注朱稱鬱金賦曰稱當作穆本書魯靈光殿賦注引可證

江斐於是往來五臣斐作妃良注可證

斯實神妙之響像五臣響作饗翰注饗象言未審也

嗟難得而覩縷六臣本嗟作羌注同是也王元長曲水詩序

羌難得而稱計引此賦作羌可證

注爾雅曰嗟楚人發語端也胡公攷異曰爾雅無此文疑爾

當作小卽西都賦注所引之小雅曰羌發聲也

異琴蘆薹屢囑冬菹段校云蘆是譌字當作菹廣韻菹菹花

貌六臣本菹作倩

注通曰冬生尤本曰字空格胡公攷異曰疑曰冬當作冬日

注亦草之貌也草當作華此引爾雅郭注

注 薑 漿大如累 又 漿類也 姜氏皋曰本草綱目廉薑釋名薑

漿也李時珍曰異物志薑漿生沙石中似薑大如羸然則累當作羸又通志云薑漿似山薑而根大是薑漿乃其名也似漿不當作類字解疑漿者讀如刺猬爾雅釋木櫟其實棟郭注有棟漿自裹也埤雅云漿有漿蝟自裹羣芳譜亦云漿苞生外殼刺如蝟是可取以相證矣

綸組紫絳 林先生曰邵晉涵注爾雅吳任臣注山海經並以綸爲青苔紫菜之屬又太平御覽引吳普本草云綸布一名昆布陸藏器本草云昆布葉如手大似薄韋紫赤色據此則紫絳二字或卽言綸組之色耳

食葛 林先生曰劉注謂食葛蔓生又云根大美于芋故何義門疑卽今之蕃薯其實非也盛氏世佐曰食葛理粗如首烏

大者若小兒形亦名乾葛予在嶺南惠潮之間常食之

東風扶留 玉篇東風作葉風說文繫傳扶留作浮流何曰廣

韻引廣州記云東風菜陸地生莖赤和肉作羹味如酪香如

馬蘭玉篇作葉風

注豆蔻生交趾至石榴辛且香 此三十字依賦正文當移在

蒟草樹也至食之益美三十四字之下

注乾之亦又其華離婁 六臣本亦作赤婁作樓是也

注味辛可食檳榔者斷破之以合石黃灰 按可字疑衍食當

連下檳榔讀胡公攷異曰石當作古見下注各本皆誤

暱兮菲菲 五臣作暱暱菲菲翰注可證

注許氏記字曰岳岷隅而山之節也 此劉注引說文也卽今

之解字而當依說文改高

注 菲菲花美貌也 此六字當移在方言曰十二字下

注 菴施艸拔其心不死江淮間謂之宿莽屈原嘉之以其志故
離騷曰夕覽州之宿莽 其字衍六臣本心下行而字案方言
莽草也南楚曰莽爲草之總名郭璞讚曰菴施之草拔心不
死屈平嘉之諷詠以比取類雖邇興有遠旨

木則楓柳檉樟 又平仲楮櫟 六臣本檉樟作豫章楮櫟作君
遷是也此注中作君遷尙不誤

松梓古度 庾信枯樹賦作松乎古度

楠榴之木 胡公攷異曰楠當作南各本注皆作南謹按六臣
本楠下有南音蓋五臣作楠段曰楠特楠之俗榴乃瘤之誤
杗瘤之木猶今人云癭木也癭木多杗樹所生故曰杗瘤

注 楨櫨二木名 櫨當作樞

注劉成曰 汪氏師韓曰劉成說未詳何本

重葩苑葉 五臣苑作掩向注可證

注殷仲文所謂幽律 孫氏志祖曰謂南州桓公九井作詩爽

籟警幽律即見本書二十二卷非別有吳都賦注也

注說文曰筑似箏五絃之樂也 今說文似箏作以竹曲按以

竹曲三字恐由似箏兩字轉寫致誤

其上則援父哀吟狎子長嘯又爭接縣垂注見人嘯 六臣本

則下有有字援作猿爭接縣垂作爭縣接垂嘯當作笑注引

山海經可證顧氏千里曰案此注嘯上十一字不相照應恐

係尤本誤添

注揚雄方言曰透驚也 廣雅釋詁透嬌也義可互證

注山海經曰獄法之山有獸狀如犬人面見人則笑名狎 此

作笑與今北山經合惟北山經作名山獬

注枚乘兔園賦曰上湧雲亂葉輦散 六臣本上作騰陳校葉

上添枝字據古文苑也

烏菟之族 六臣本烏作於注中菟並作塗姜氏皋曰左氏傳

使營菟裘公羊傳作塗裘是菟與塗通

注爾雅曰梟羊一名萬萬如人而脣黑身有毛反踵見大則笑

左手操管海南經所云也 爾雅下當有注字爾雅釋獸獬狴

如人被髮迅走食人郭注梟羊也山海經曰其狀如人面長

脣黑身有毛反踵見人則笑按說文引爾雅獬狴作萬萬今

海內南經梟羊作梟陽見人則笑作人笑亦笑

注山海經曰南海之外有狻猊狀如龜龍首食人 今海內南

經作窳窳龍首居弱水中其狀如龍首食人又北山經言窳

鯀狀如牛而赤身人面馬足又海內西經言鯀鯀蛇身人面
皆與此異獨無所謂狀如獬者而爾雅說文均有獬獬類獬
之語劉注蓋誤合之

注
穎鋒也 胡公攷異曰鋒當作鋟各本皆誤

文選旁證卷第七

長樂梁章鉅撰

卷五下 吳都賦下

其竹則簣簣綵簣桂箭射筒 六臣本綵作林初學記竹部引戴凱之竹譜曰竹之別類有六十一焉有桂竹甚毒傷人必死有箭竹節間三尺堅韌中爲矢

柚梧有篁 胡公攷異曰柚當作由注中作由各本皆同柚下注由字乃五臣音以亂善耳林先生曰柚梧當卽吳均竹賦之猶簣也說文篁竹田也

^注始興以南又多小桂夷人績以爲布葛 此十五字應移在圍二尺長四五丈句下或曰夷人七字應移在射筒注後

^注桂竹生於始興小桂縣 段曰小桂當作桂陽晉始興有桂

陽縣小柱二字蓋涉下文而誤耳

注射筒竹細小通長長丈餘亦無節可以爲射筒筒及由梧皆出交趾九真 胡公攷異曰下射筒當作筒射各本皆倒筒句絕射下屬也詳劉注意簣簣也林箴也桂也箭也射筒也由梧也簣也簣也凡入竹此但可以爲筒耳非單名筒也段曰通長當作通中兩筒字之中間當脫射字戴凱之竹譜云射筒薄肌而最長節中貯箭因以爲名與劉注無節異

注檀樂蟬蛸

六臣本蟬蛸作蟬娟是也注中作蟬娟不誤

注

驚驚鳳鵠也鵠鵠周本紀曰鳳類也非梧桐不棲 六臣本

無鳳鵠也及周本紀曰七字鳳上有皆字又無末五字

注

馴擾善也

胡公攷異曰當作擾馴也各本皆誤

注

枚乘兔園賦曰修竹檀樂夾水

夾下當有池字

柳葉無陰 六臣本陰作蔭

結根比景之陰

注

比方利反一作北景云

案此注以上皆漢

書音義文地理志曰南郡比景縣如淳曰日中於頭上景在
已下故名之卽此注所引郡國志無注其字亦作比兩漢有
比景縣無北景縣惟程氏大昌攷古編以爲漢書比景當依
舊唐書作北景又徐氏文靖管城顧記云張衡應問曰日南
則景北南越志云五月立表望之日在表北景居南則漢志
比景疑是北景然闕駟自讀比爲庇以爲景在已下爲身所
庇也

系紫房

又

孔雀綵羽以翺翔

六臣本系作係以作而

注

驚蟻也

毛本蟻作蛄誤段校云蜀都賦作蛄蟻

雜插幽屏精曜潛穎

屏字與上下不叶韻恐有誤穎五臣作

類翰注雖在幽僻之處常類然有異光也朱氏珣曰屏字不叶韻誠然但江氏永古韻標準所舉隔韵遙韻之法如詩楚茨生民等章亦可通則此處谷與上樸玉下黷綠韵中屏類二句自爲韻亦可姑存俟考

林木爲之潤黷 說文繫傳引木作麓

金華采者 此四字恐有訛脫陳校於金華下添金有華三

字亦恐誤涉下李注耳

張祿先生曰宋有結綠 顧氏千里曰本書魏都賦孟陽注

范睢更名張祿先生此賦淵林注所引宋有結綠睢獻書昭

王中語也見戰國策史記

說文哲擿空青珊瑚墮之 今說文作哲上擿山巖空青珊

瑚墮之

陵鯉若獸

注

陵鯉有四足狀如獺鱗甲似鯉居士穴中性好食

蟻楚辭曰陵魚曷止王逸曰陵魚陵鯉也

初學記魚部引山

謙之南徐州記及此賦並作鮫鯉按此注說陵鯉蓋卽今之

穿山甲也又所引楚辭今天問篇作鱗魚何所

崧隆異等

說文崧汙邪下也徐鍇引吳都賦曰崧隆異等崧

隆甲高也按等字與上倍下在似不韻顧亭林據廣韻收等

字於十五海音多改切而引昌黎許國公神道碑銘上之宅

憂公議太宰養安蒲坂萬邦絕等又李庾西都賦謚萬類淳

四海遂開國以報功差于男之五等爲證乃於此賦失引

穉秀

翰注穉麥也按本書七發及大招皆云穉麥王逸云擇

麥中先熟者也廣韻穉者稻處種麥皆早取之義說文穉早

取穀也內則稍穉注生穰曰穉則穉穉字皆通

國稅再熟之稻 許氏慶宗曰水經溫水注各白田種白穀七月火作十月登熟名赤田種赤穀十二月作四月登熟所謂兩熟之稻也

鄉貢八蠶之綿 野客叢書云廣記曰南一歲八蠶以其地暖故爾而海物異名記乃謂八蠶共作一繭與前說異丹鉛總錄引永嘉記云永嘉有八輩蠶昉珍蠶三月績柘蠶四月初績阮蠶四月初績愛珍五月績愛蠶六月末績寒珍七月末績四出蠶九月初績寒蠶十月績凡蠶再熟者皆謂之珍按宋人西溪叢語已引雲南志云風土多暖至有八蠶言蠶養至第八次不中爲絲祇可爲綿故云八蠶之綿也

用累千祀 六臣本祀下有也字是也胡公攷異曰此與下文煥炳萬里也偶句恐無者傳寫脫

注亦有水陸門皆 胡公攷異曰皆下當有有樓二字

造姑蘇之高臺 林先生曰按吳地記吳王闔閭十一年起臺於姑蘇山因名夫差復因而飾之

佩長洲之茂苑 困學紀聞十云余仕於吳郡常見長洲宰其圃扁曰茂苑蓋取諸吳都賦余曰長洲非此地問其故余曰吳王濞都廣陵漢郡國志廣陵郡東陽縣有長洲澤吳王濞太倉在此東陽今盱眙縣故枚乘說吳王云長洲之苑服虔以爲吳苑韋昭以爲在吳東蓋謂廣陵之吳也曰它有所據乎曰隋虞綽作長洲玉鏡蓋煬帝在江都所作也長洲之名縣始於唐武后時也 閻氏若璩曰萬歲通天元年析吳縣置長洲蓋取越絕書吳越春秋走犬長洲之文以名非枚乘所說姜氏皋曰北史隋書虞綽傳並云晉王廣引爲學士大

業初轉爲祕書學士奉詔與祕書郎虞世南著作郎庾自直等撰長洲玉鏡等書十餘部按大業初煬帝未幸江都也史鑑具在不足牽引爲長洲在江都之證且長洲玉鏡二百三十八卷隋書經籍志列於雜家亦非誌地之書竊疑長洲玉鏡者取東方朔十洲記之長洲耳漢武帝內傳亦載長洲是也圖經續記云吳郡西南七里有長洲鄉吳郡志亦無異辭是吳之長洲舊矣錢氏大昕云太沖所賦孫吳之都其時廣陵不在吳境則今人稱長洲爲茂苑未可厚非也

起寢廟於武昌 張氏雲璈曰宋書五行志權稱帝已十七年竟不於建業剏七廟但有父堅廟遠在長沙賦所云不知何據姜氏舉曰吳書孫亮傳五鳳二年十二月作太廟裴注吳志曰正月初鐘立廟稱太祖廟是吳有寢廟也魏書諸葛誕

傳注黃初末吳人發長沙王吳芮冢以其塋于臨湘爲孫堅立廟是廟并不在長沙也

抗神龍之華殿又飾赤烏之韡曜大臣本韡作暉玉海百

五十九引建康宮殿簿云太初宮中有神龍殿去縣三里左太沖吳都賦云抗神龍之華殿是也赤烏殿在縣東北五里吳昭明宮內制度上應星宿

注在丹陽孫權自會稽至不向武昌居大臣本無此三十三

字是也何曰權當作皓不樂徙乃孫皓時事也今案三國志

吳主傳黃初二年辛丑四月權自公安都鄂改名武昌黃龍二

年酉配九月權遷都建業此一事也嗣主傳甘露元年乙酉九月

從西陵督步闢表都武昌寶鼎元年丙辰十二月皓還都建業

此又一事也二事相去三四十一年然前後並無自會稽徙治

丹陽建業之事

按三國吳主傳建安五年曹公表權爲討虜將軍領會稽太守屯吳十六年權徙治秣陵

明年城石頭改秣陵爲建業云云何所言恐誤其爲牽合舛錯明矣何義門不悟尤

本所添實非劉注而有不樂徙乃孫皓時事之校語其實卽依何改權仍無可通又案宋書五行志孫皓初童謠曰寧飲建業水不食武昌魚寧還建業死不止武昌居皓尋遷都武昌民泝流供給咸怨毒焉尤本乃作寧飲建業水不向武昌居亦舛錯不可通

注

皆建業吳大帝所太初宮

六臣本無此十字有二字屬下

是也胡公攷異曰此與上文皆不知何人所謬記尤本誤取以增多旣云吳大帝又云孫權一人之稱乖刺如此尤爲誤中之誤姜氏舉曰袁本作臨海赤烏皆建業初宮殿名也竊疑建業初三字亦屬不辭建業是地名非年號不得云初也

或是神龍正殿名臨海赤烏皆建業吳大帝所居太初宮中殿名也云云舊注或衍或脫遂不可通耳

注大夫種六臣本種下有蠶字

房櫳對橫又左稱彎碕五臣橫作槐濟注可證碕作崎翰注可證

右號臨礪玉篇作臨礪山見吳郡段校云玉篇誤案吳郡志引名山志云支礪山在龍池山東北吳都賦云右號臨礪也蓋山多平石故以礪名

注說文曰櫳房室之疏也今說文櫳房室之疏也別有櫳檻也按倉頡篇櫳疏也亦作櫳段曰二字不嫌同偁左木右龍之字恐淺人所增然說文檻亦曰櫳也本書長楊賦注引釋名檻車上施闌檻以格猛獸亦囚禁罪人之車也是則櫳之

爲檻者有籠字之義華嚴經音義引三倉櫳所以成禽獸也
是已廣雅釋室櫳舍也櫳牢也則又互異矣

注

又曰橫帷屏屬然則門窗之廡通名橫橫與梘音義同 今

說文橫所以几器一曰帷屏風之屬錢氏坫曰玉篇作帷橫
屏風屬說文似脫一字吳都賦房櫳對橫俗作幌文字集畧
曰幌以帛明窓也按橫梘古今字徐鍇繫傳引謝惠連雪賦
曰月承幌而通輝幌卽橫字然皆與李注門窓云云不合

注

汲郡地中古文冊書

按此卽竹書紀年

注

朱闕雙立馳道如砥 方輿勝覽引宮城記云吳時自宮門南

出至朱雀門凡七八里 寺相屬自太司馬門出者爲御街
夾街爲御溝自端門出者爲馳道自西掖門出者爲右御街
韓詩曰甕水流進貌 六臣本作韓詩曰甕進也胡公攷異

注

曰此當作疊疊進也六臣本脫重疊字耳所引當是疊疊文王之傳後來考韓詩者從而認爲鳧鷖在疊益誤矣

解署綦布 六臣本解作解孫氏志祖曰古尺有解字玉篇角部解字注又古隘切署也吳都賦云解署綦布

其居則高門鼎貴魁岸豪傑 六臣本則下有有字傑作桀

魁岸大度也漢書曰江充爲人魁岸 案依賦正文則魁岸

大度以下十四字應移在故曰鼎貴也之下

注虞虞文秀魏魏周顧顧榮陸陸遜隆吳之舊貴也 何曰虞

魏吳志無傳文秀當是文繡則仲翔之父也魏周當作魏周

榮顧榮當作顧雍陳校亦同胡公攷異曰六臣本作虞魏顧

陸吳之舊姓也最是何陳所校攷云云皆未悟非劉注耳

中酒而作 顧氏炎武曰知錄二十七云樊噲傳項羽既饗軍

士中酒中酒謂酒半也呂氏春秋謂之中飲晉靈公發酒於
宣孟宣孟知之中飲而出戰國策楚王觴張儀中飲再拜而
請凡事之半曰中左昭二十八年傳中置謂饋之半也史記
河渠書中作而覺謂工之半也呂氏春秋中關而止謂關弓
弦正半而止也中酒猶今人言半席師古解以不醉不醒故
謂之中失之矣司馬相如傳酒中樂酣師古曰酒中飲酒中
半也一人注書前後不同如此

注手搏爲拚張氏雲璈曰甘延壽以良家子弟善騎射試弁
爲期門孟康注弁手搏卽拚也

開市朝而並納六臣本並作普

士女佇眙方言眙逗也郭璞注逗卽今住字眙謂注視也說
文眙直視也皆可與劉注立視相證

雜沓從萃 五臣從作澁良注可證

流離 漢書西南夷傳尉賓國出流離顏注引魏畧云大秦國出赤白黑黃青綠縹組紅紫十種流離此蓋自然之物采澤光潤踰於衆玉具色不恒今俗所用皆銷溶石汁加以衆藥灌而爲之虛脆不貞實非眞物按琉璃蓋卽今之寶石顏所謂非眞物者乃今所謂琉璃耳

注 許慎淮南子注曰埜相連也 今淮南子無埜字顧氏千里曰淮南子脩務篇埜虛連比埜卽比字許高兩家之不同也廣韻埜相連與比比次皆毗必切集韻埜地相連次與比次也皆薄必切皆在入聲五質可證

金鑑磊砢 六臣本鑑作濫砢作珂

注 史記曰趙孝成王一見虞卿 六臣本記下有虞卿傳三字

見下無虞卿二字

注

吳人謂簞爲笙 方言簞宋魏之間謂之笙或謂之籥自

闕而西或謂之簞郭注今江東通言笙與此合王氏念孫曰
笙者精細之名方言自闕而西秦晉之間凡細貌謂之笙簞
爲籥條之細者故有斯稱段曰笙者太簇之氣象萬物之生
故曰生釋名笙生也初生之物必細故方言云然

蕉葛升越弱於羅紈

注

蕉葛葛之細者升越越之細者

段曰

升當作竹蕉葛竹越畫然四事蕉卽芭蕉藝文類聚引廣志
曰芭蕉其皮中莖解散如絲續以爲葛謂之蕉葛南州異物
志曰甘蕉取其莖以灰練之續以爲練異物志曰取鏤煮之
如絲可紡績爲締絡唐六典江南道建州貢蕉練嶺南道端
州調以蕉布此蕉布之證也葛布則詳見於諸經傳葛卽締

綌也竹布一見王符潛夫論浮侈篇曰葛子竹越箛中女
布此亦四事葛子一也竹一也越一也箛中女布一也後漢
書王符傳載此篇李賢注引沈懷遠南越志云布之品有三
有蕉布有竹子布又有葛焉雖精粗之殊皆同出而異名也
按南越志言蕉竹葛而不言越李賢遂未釋越疎也今本潛
後漢書亦一見尚書禹貢夷卉服正義引吳都賦蕉葛竹
越弱於羅紉孔仲遠不言竹越爲何物今注疏本亦一見史
記夏本紀夷卉服張守節正義曰東南草服葛越蕉竹之
屬此句全用吳都賦而獨作竹不誤作升又錯互其辭明竹
與越不爲一事也一見本賦桂箭射箛注云始興以南又多
小桂夷人績以爲布葛小桂者桂竹之小者也此竹夷人績
爲布如葛亦竹布之一證一見稽含南方草木狀簞竹葉疎

而大一節相去五六尺出九真彼人取煆者礪浸紡績爲布
謂之竹練布一見太平御覽引顧微廣州記平鄉縣有苞竹
可爲布一見唐六典嶺南道貢竹布一見元和郡縣志韶州
貢竹布十五疋也越者紵布也其字古作越今作絨廣韻絨
紵布集韻同張守節夏本紀正義云越卽苧布唐六典山南
道淮南道劍南道賦貢皆以紵按紵苧截然二字說文紵者
縠屬以爲布白而細曰紵其字從系俗作苧者誤也賦云弱
於羅紵者謂四物以艸竹爲之而賦於蠶絲所成故王符以
與細縠綺縠冰紵錦繡並稱而葛子竹越居首也原注以蘆
葛竹越爲二事恐非按此所辨訂甚精然張劉注本皆太沖
自爲之何以錯繆如此也

儼嘉樂繆 六臣本儼作澀胡公攷異曰琴賦紛儼嘉以流漫

廣韻二十六緝儼言不止皆可借證又集韻謔言不止疑

澀又謔之譌耳說文繫傳言部囂字下引作颯澀及囂

注方言曰諠吁橫切諠通也 六臣本兩諠字皆作聖胡公攷

異曰方言有諠音也在十二卷別無諠通也此當作諠音也

吁橫切諠與聖通今所誤不可讀

注說文曰呶吸也 今說文呶吸呶也

富中之毗 五臣毗作岷銳注可證

注越絕書曰富中大塘中也勾踐治以爲田 六臣本塘下無

中也二字田土有義字是也此所引見紀地傳

注富中之食貨殖之選者各利 胡公攷異曰食當作人各利

似當云各乘其時以射利

注說文曰毗田人也 今說文毗田民也

扶掄屬鏐 五臣扶掄作拔投良注可證

^注遂殺闔閭 六臣本闔閭作王僚是也

去厖自閭 厖當作厖說文厖盾也從盾𠂔聲繫傳引此作厖

扶月反

純鈞湛盧 六臣本鈞作鈞誤也注同顧氏千里曰毛本亦誤

作鈞此賦下句言純鈞湛盧上句言吳鈞越棘不得複明矣

越絕書記寶劍篇純鈞正作鈞惟道藏淮南子修務篇作鈞

因南宋避嫌各缺筆莊氏達吉重刻本改作鈞亦誤

戈船掩乎江湖 六臣本乎作於

^注國語曰奉父犀渠 ^注父當作文此引吳語文犀上當有之字

^注組甲三千 ^注陳王卒官帥擁鐸建祀姑 段校云于左氏傳

作百國語吳語王作士祀姑作肥胡祀姑幡各麾旗之屬惠

氏士奇以爲東京賦戎士介而揚揮薛綜云揮爲肩上絳幟如魚尾說文以絳微帛箸於背者是也

注一校千二百九十六匹 六臣本無一字是也胡公攷異曰

按此節鄭注而引之乃五種合之數添一字誤

注夫南之外有金鄰國 段校云水經注金隣清渚張籍詩銅

柱南邊壽草青行人何日到青隣鄰皆作隣古今字也

注又有象林郡 胡公攷異曰又字不當有郡當作縣各本皆

誤按漢書地理志續漢書郡國志並言曰南郡故秦象郡縣

五朱吾比景盧容西捲象林

俞騎騁路指南司方 隋書禮儀志云指南車大駕出爲先啟

之乘漢初置俞兒騎並爲先驅左太冲曰俞騎騁路指南司

方後廢其騎而存其車

出車檻檻 旂魚須 六臣本檻檻作輦輦旂作旗

左氏傳曰衿服振振衿同也 續漢書輿服志注引吳都賦

曰衿阜服也今注無之本書閒居賦服振振以齊元注引左

氏傳衿服振振服虔曰衿服黑服也按今本左氏傳及國語

晉語衿服並作均服左傳釋文均如字同也周禮司几筵疏

引傳文亦作均惟漢書五行志中之上引作衿顏注衿服黑

服卽用服注呂氏春秋悔過篇今衿服四建高注衿同也兵

服上下無別故曰衿服續漢書輿服志有衿元之服蔡邕獨

斷以衿爲紺紺元紺色皆近黑戰國策趙策令補黑衣之數

以衛王宮此戎事黑服之證然則訓同或訓黑服義實相足

故李注不複舉而於閒居賦分見之也

注 毛詩曰貝冑朱紱 尤本貝冑字誤倒說文紱从糸侵省聲

此不省亦非

民蹶連綱

又

穀騎燁煌

毛本綱誤綱六臣本燁作爛

注

周易曰蹄所以在兔

何校易下添畧例二字陳同是也

注

犬獾不可附也

犬獾當互乙今說文獾犬獾獾不可附也

直髮馳騁

注

史記曰荆軻怒髮直衝冠

金氏姓曰宜引西京

賦植髮如竿

注

尚書曰稱爾干

六臣本干下衍戈字按此以下至末當屬

李注尚上應加善曰二字

長殺短兵

注

廣雅曰殺矛也

今廣雅釋器殺作殺音義同段

校云廣韻矜矛也引此賦作長矜短兵

飛爛浮烟

又

菹擻雷礪

又

崩轡池岑

六臣本爛作爛菹作拉

弛作陀段校云菹當作拉說文庶石聲也玉篇庶亦拉字礪

當作破音痕

鹿死不擇音

左氏文十七年傳杜預注曰音所秣廕之處

古字聲同皆相假借服虔解詁曰鹿得美草呦呦相呼至於困迫將死不暇復擇善音急之至也劉炫規過曰謂不擇音而出之顧氏炎武杜解補正亦從服說張氏雲璈曰賦中本與林陰岑爲韻當時未嘗讀音爲蔭也

封豨豨

五臣莠作莠向注可證孫氏志祖曰字彙補莠呼各

切音堅豨吼也通作莠無莠字此傳寫誤段曰莠字求之廣韻集韻類篇皆無有惟正韻莠轉覺切引吳都賦豐豨莠注豨聲然從女不才非今文選字也考之廣韻豨許角切豨聲集韻豨黑角切豨聲又許侯切字林豨鳴也廣韻亦有去聲是豨卽豨字莠當爲豨之異字

^注頽絆前兩足也莊子曰連之羈頽音聳 六臣本無音聳二

字按頽與繫音義並同絆前兩足係說文訓莊子馬蹄篇連之以羈雷釋文司馬向崔本並作頽崔云絆前兩足也與此合此音聳二字恐有誤衍

^注麋大麋也桂林有麋 六臣本二麋字作麋按爾雅麋大麋釋文麋本作麋此麋與麋並當爲麋字之誤

^注山海經曰駮如馬白身黑尾一角鋸牙虎爪音如鼓能食虎也 今西山經作其狀如馬而白身黑尾一角虎牙爪音如鼓音其名曰駮是食虎豹無鋸牙字而海外北經有之劉注蓋兼引二經之文爾雅駮如馬倨牙食虎豹郭注引山海經云有獸若駮如白馬黑尾倨牙音如鼓食虎豹亦兼引二文古人引書有此例也

注鳩鳥一名雲白 白當作日說文鳩毒鳥也一名運日廣雅

鳩鳥其雄謂之運日其雌謂之陰諧雲運聲近白日形近而

誤淮南子繆稱訓暉日知晏陰諧知雨暉日亦運日之譌

鷦音京 段校云鷽是鷽之譌注引師曠羌鷽語見說文

覽將帥之拳勇注毛詩曰無拳與權同 陳曰據注拳當作權

是注謂詩之拳與此賦之權同耳

與士卒之抑揚 何校抑揚改揚抑陳曰抑叶韻是也

將抗足而趾之 六臣本而作以

注押兩手擊絕也 六臣本無絕字

猩猩啼而就擒 後漢書哀牢夷傳注引南中志曰猩猩在山

谷中行無常路百數爲羣土人以酒若糟設於路又喜屬于

土人織草爲履數十兩相連結猩猩在山谷中見酒及麝知

其設張者卽知張者先祖名字乃呼其名而罵云奴欲張我
捨之而去去而又還相呼試共嘗酒嘗許又取麕子著之若
進兩三升便大醉人出收之麕子相連不得去執還內牢中
人欲取者到牢邊語云猩猩汝可自相推肥者出之旣擇肥
竟相對而泣卽左思賦猩猩啼而就禽者也

禺禺笑而被格 六臣本禺禺作嚳嚳按爾雅作狌狌說文作
禺禺逸周書作費費山海經注作髣髴實一物也

掩蔽廣澤 翰注鵬翼垂天今斬之故掩蔽廣澤也

狼跋乎紉中 本書羽獵賦遙矖乎紉中

闕子曰 據本書鮑昭詩注當作闕子

說文曰睽暫視也睽疾視也 今說文睽暫視睽目熟視
也段曰說文解字注作睽目疾視也錯本疾作孰非古睽睽

聯用雙聲字也韻會引錯本作目急視毛晃增韻龍龕手鑑皆作急是也說文別有眇字解作目孰視也

^注許慎淮南子注曰岬山旁今淮南子無岬字顧氏千里曰

原道篇而彷彿於山峽之旁高誘注兩山之間爲峽岬字卽峽字許高兩家之不同也水經注江水篇字亦作岬引注岬山脅也疑所見許注或作脅

^注說文曰鸛鸛也音須又曰鸛鳥大鸛也今說文鸛鹿鸛出讀若便弱之便又鸛鳥大鸛也从佳麥聲一曰雉之暮子爲鸛別有鸛見鳥部云天鵠也以鳥麥聲

^注春秋元命苞曰日月兩設以蟾蜍與兔者陰雙居月中有兔曰字不當有說詳月賦各本皆衍

^注已見蜀都賦已上當有鳥字謂蜀都賦陽鳥迴翼句注已

引元命苞云云也

廻靶乎行邪睨 六臣本無邪字按此疑誤無以訂之翰注廻
轡乎行視之處云云亦未明林先生曰三字必有一衍想是
地名存以俟攷倪氏思寬曰左傳拔旆投衡注云使不帆風
差輕釋文帆本又作靶普霸反說文帛二幅曰靶通俗文帛
三幅曰靶廣雅云帳也準此以思則靶字得與帆同義竊意
迴靶之靶當是靶字之譌欲觀魚三江必先候風五兩迴帆
邪睨將有乘風破浪之樂作爲水獵發端豈不情形畢肖
注小山別大山曰嶰 今爾雅小山別大山鮮釋文鮮或作嶰
案嶰或卽嶰字之誤蓋所傳本異也 以爾雅郭注云不相
連詩皇矣度其鮮原傳小山別大山曰鮮正義引孫炎曰別
不相連也郭注蓋本此然不相連於嶰義爲近本書長笛賦

嶰壑澮峴注引爾雅亦同此

比鷁鳥而有裕邁餘皇於往初 大臣本而作之餘皇作舩舩

朱氏珔曰左傳作餘皇則此不誤本書江賦注引傳作舩舩

舩舩二字說文在新附中廣雅作舩舩

^注方言曰江湖凡大船曰舩 王氏念孫曰舩者洪大之稱門

大開為閭大杯謂之閭大船謂之舩義皆相近

^注船上下四方施板者曰檻也 檻與舩同故下李注直引釋

文作舩三國吳志周瑜傳曰蒙衝門檻晉書忠王尚之傳音

義引字林云檻屋船也

^注釋名曰上下重牀曰檻 今釋名云上下重板曰檻四方施

板以禦矢石其內如牢檻也此牀字誤

張組幃又槁工機師 大臣幃作帷槁作篙機作楫胡公攷異

曰尤本取方言故篙爲橈而又誤成槁也

注方言云刺船曰槁 槁當作橈今方言作所以刺船謂之橈

注洪流響 六臣本流作波

注說文曰籟三孔籟也 說文大者謂之笙其中謂之籟小者

謂之箛錢氏站曰爾雅籟作仲當从許君高誘呂氏春秋注

以爲二孔風俗通云三孔

籟籟 胡公攷異曰籟字誤劉與善皆無注索茶陵二本音

所買西京賦纏纏 薛注云纏網如箕形狹後廣前善曰纏

所買切蓋此賦字本與彼同故善不更注林先生曰筌罩罩

皆實字則纏字義亦當配向注籟鈎也似可從

爾雅備束 又微鯨輩中於羣鰭 六臣本備作倨輩作背

注鮓左右鮓一目所謂比目魚也 下鮓字當作各鄭氏樵爾

雅注云比目魚爲王餘然此賦上文有雙則比目片則王餘也鄭說疑誤

注坎爲水上直魚生一艮爻也 大臣本魚作巽一作三是也 毛本作巽尚不誤按當作上直巽九三王氏應麟輯鄭氏易引此條可證

注言微小也 至故以相況 此六句是淵林就賦義釋之王氏輯鄭氏易誤連上文爲鄭注當係鈔胥之失惠氏棟周易述復申其說曰鄭據六曰七分謂中孚十一月卦辭豚魚吉巽爲魚巽以風動天故云感動天地并五月卦九二失位微陰未應故云魚之至小可笑也

注爾雅曰鰮大魚鰮音遐 魚字不當有鰮當屬上讀 注又曰鰮兼有也 又曰當作說文曰鰮傳從有龍聲讀若籠

錢氏站曰平準書盡籠天下之貨物當從此

注其釣惟何注六臣本惟作伊今詩正在其釣維何維惟同

注北山經曰發鳩之山有鳥狀如鳥而文首白喙赤足名精衛

其鳴自呼赤帝之女姓姜遊於東海溺而死不返常取西山木

石以填東海今北山經其鳴自呼作其鳴自諉赤帝之女姓

姜作炎帝之少女名曰女娃溺而死不返作溺而不返取作

銜填作埋按北山經郭注娃惡佳反本書魏都賦玃玃精衛

注引亦作女娃知此注姓字譌姜字衍也魏都賦注引作溺

而不返無死字郝氏懿行曰溺而不返非溺死之謂列仙傳

載炎帝少女追赤松而得仙是知東海溺魂西山銜石乃神

靈之變化非仇海之冤禽矣今按魏都賦正文云玃玃精衛

銜木償怨怨與冤義同太沖之解未必同郝氏也

西山經曰秦器之山澆水出焉是多鰐魚狀如鯉魚身而鳥

翼蒼文而白首赤喙常行西海而遊東海夜飛而行今西山

經秦器作泰器漢水作觀水鰐上多文字鯉下多一魚字游

上無而字夜飛而行作以夜飛按本書七啟注引與此注同

惟秦器作泰器與今山海經合

亂費錦纈五臣亂作亂濟注亂費猶依稀也林先生曰通雅

亂費猶出納之吝也方言貪而不施曰亂漢書不足以壹費

訛為亂方言臆度而造左思采獲之耳

注回淵水也回上當有說文曰三字本書魏都賦回淵濯注

引說文淵回水也可證此引其意不必拘其辭

注漢女賈大夫此上應加善曰二字

翼颶風之颶颶注離騷曰溢颶風兮上征今離騷作溢埃風

余上征說詳彼

注瀏瀏風初貌 初當作利各本皆誤

數軍實乎桂林之苑饗戎旅乎落星之樓 余曰南朝宮苑記

曰桂林苑在落星山之陽金陵地記曰吳嘉禾元年於桂林苑落星山起三重樓各落星樓

飛輕軒而酌綠酈 六臣本酈作醪按依注作酈爲是綠當作

淥水經耒水注云耒水出桂陽郴縣南山縣又淥水出縣東俠公山西北流而南屈注於耒謂之程鄉溪郡置酒官醖於山下名曰程酒獻同酈也桂氏復曰荊州記淥水出豫章康樂縣其間烏程縣有井官取水爲酒與湘東酈酒年常獻之世稱酈淥鄒陽酒賦曰其品類則沙洛淥酈

注王逸曰太湖在秣陵東 爾雅十藪吳越之間曰具區郭注

今吳縣西南太湖卽震澤也周禮職方揚州澤藪曰具區班固以爲卽震澤山海經浮玉之山北望具區太湖也越絕書吳地傳太湖周三萬六千頃其千頃烏程也去縣五十里水經沔水注引吳記曰太湖有苞山在國西百餘里胡氏渭曰今蘇之吳縣吳江湖之烏程長興常之武進宜興無錫也縣皆瀕太湖楊修五湖賦云頭首無錫足蹄松江負烏程於背上懷大吳以當胸此數言可作圖經也羣籍所紀均與秣陵無涉而注云在秣陵東者豈古未有東吳時宣歙金陵九陽江之水可入太湖歟

幸乎館娃之宮 張氏雲璈曰方氏廷珪以爲此言回建業而幸離宮非姑蘇之館娃引述吳王有別館在句容楸梧成林故名梧宮或云館娃宮有梧桐園夫差時童謠云梧宮

秋吳王愁云云然越絕書吳人於研石山置館娃宮吳郡續
圖經研石山在吳縣西二十里自當以越絕書爲正

登東高又吳愉越吟 六臣本登作發愉作飲

注樂作東歌 此見晏子春秋然文心雕龍樂府篇云夏甲歌
於東陽東音以發劉子亦云夏甲作破斧之歌始爲東音夏
甲是孔甲不作樂蓋據呂氏春秋

注呂氏春秋曰禹行水 今呂氏春秋音初篇行水作行功說
詳南都賦

注楚辭曰吳歛蔡謠 六臣本飲作愉今招魂作飲按廣雅釋
樂歛吟歌也愉飲古蓋通用

動鐘鼓之鏗取有殷 六臣本鼓作磬取作鉉

注天水之大名曰隴坻 段校大下添坂字

魯陽揮戈而高麾 何曰無揮麾二字連用之理揮當作援

注與韓趙 何校趙下添難字陳同是也

注良辰之所以覺速 又以適已之盛觀也 尤本速誤作也六

臣本觀作歡是也

闔閭信其威 六臣本信作申

注與齊晉爭衡 此下至孫子兵書五十五字六臣本無之是

也此上下皆引吳語文何得夾入他語乎

注晉惡之 六臣本惡作亞是也

注孟子曰越人彎弓而射我 毛詩小弁傳引孟子兄弟闔弓

而射我音義曰闔本亦作彎角弓正義亦引孟子云兄弟闔

弓而射我句法正同

畢世而罕見丹青圖其珍瑋 又翫其奇麗也 六臣本無而子

其上有象字麗下無也字按與下文偶句相配依此爲是

注書曰紂南巡狩陟方死 六臣本無此九字有善曰二字

剖判庶士 何校士改土孫氏志祖曰庶士見書庶士見詩皆

可通然此處上文云士有陷堅之銳俗有節概之風下以剖

判庶士商榷萬俗分承恐當作士也

商榷萬俗 陸機吳趨行云淑美難窮紀商榷爲此歌商榷與

揚榷同說詳蜀都賦

注禹所受地說書曰 太平御覽八十二黃帝元女占法曰天

下經十二卷禹未及持其四卷飛上天禹不能得也其四卷

復下陂池禹不能極也禹得中四卷云云或卽地說書耶

注論語曰韞櫝而藏諸 釋文匱本又作櫝案本書答鄭尙書

詩注答東阿王牋注逸民傳論注引匱並作櫝後漢書張衡

傳崔駰傳逸民傳注引並同

亦猶棘林螢耀與夫檮木龍燭也 六臣本耀作曜檮作尋案

劉注引山海經檮木長千里今海外北經作尋木廣韻木名似槐又尋長也引山海經尋木又穆天子傳姑繇之木郭注引山海經亦作尋木則作檮者非也東京賦尋木起于蘄栽李注引山海經亦作尋

而與桎梏疏屬也 六臣本與下有夫字

^注適爲夫子時也 六臣本毛本爲並作來是也

^注山海經曰貳負殺狻猊帝乃梏之疏屬之山桎其右手反縛兩手漢宣帝時擊磻石於上郡陷得石室其中有反縛械人劉向曰此貳負之臣也帝曰何以知之以山海經對 漢宣帝以下當是山海經郭注文而與今本小異今海內西經注云漢

宣帝使人上郡發盤石石室中得一人跣裸被髮反縛械一
足以問羣臣莫能知劉子政案此言對之宣帝大驚於是時
人爭學山海經矣

誦詭之殊事 六臣本誦作蒨

藏理於終古 孫氏志祖曰理當作理

孟浪之遺言注司馬彪莊子注曰孟浪鄙野之語 莊子齊物

論夫子以爲孟浪之遺言李頤云孟浪猶較畧也崔譔云不
精要之貌此解與下句畧舉梗概意尤切

注謂賓言其梗概 謂當作爲各本皆誤